

Na osnovu člana 78. Zakona o prostornom uređenju („Službene novine Kantona Sarajevo“, broj: 07/05), člana 13. Zakona o principima lokalne samouprave u Federaciji Bosne i Hercegovine („Službene novine FBiH“, broj: 49/06 i 51/09) i člana 19. stav (1) tačka 2. Statuta Općine Novo Sarajevo („Službene novine Kantona Sarajevo“, broj: 35/10) Općinsko vijeće Novo Sarajevo, na 6. sjednici, održanoj dana 30.03.2017. godine, donijelo je

O D L U K U

O SJEČI I POTKRESIVANJU STABALA

Član 1.

(Predmet Odluke)

Ovom Odlukom se reguliše postupak sječe i potkresivanja stabala koja se nalaze na javnim zelenim površinama na teritoriji općine Novo Sarajevo (u daljem tekstu: Općina).

Član 2.

(Odobrenje)

Sječa i potkresivanje stabala vrši se na osnovu odobrenja koje donosi Općinski načelnik putem službe nadležne za komunalne poslove.

Član 3.

(Održavanje)

Sječu i potkresivanje stabala na javnim zelenim površinama koja se nalaze na teritoriji Općine, kao i uređivanje i održavanje javnih zelenih površina, vrši se putem kantonalnog preduzeća nadležnog za održavanje javnih zelenih površina.

Član 4.

(Stručna komisija)

- (1) Općinski načelnik rješenjem imenuje komisiju koja daje stručni nalaz (zapisnik sa lica mjesta).
- (2) Komisija broji tri člana, a u sastav komisije se obavezno imenuje jedan diplomirani inženjer šumarstva, kao i predstavnik nadležnog komunalnog preduzeća.

Član 5.

(Razlozi za odobrenje)

- (1) Sječa stabla odobriće se:
 - a) ako je stablo prestalo sa vegetacijom (oboljelo),
 - b) ako postoji opasnost od pada stabla (oštećeno),
 - c) ako stablo ugrožava život i zdravlje ljudi, instalacije komunalne infrastrukture, te stabilnost okolnih objekata,
 - d) ako se stablo nalazi na lokaciji za koju je izdato odobrenje za građenje,
 - e) ako ugrožava bezbjednost i preglednost saobraćaja.
- (2) Potkresivanje stabla odobriće se:
 - a) ako stablo svojim rastom utiče na uslove života i rada ljudi u okolnim objektima,
 - b) ako je djelimično prestalo sa vegetacijom,
 - c) ako oštećuje okolne objekte i instalacije komunalne infrastrukture,
 - d) ako ugrožava bezbjednost i preglednost saobraćaja.
- (3) Ukoliko se radi o stablu koje zbog svog položaja (stabla u obuhvatu zaštićenih površina), vrste stabla ili iz drugih razloga, predstavlja hortikulturnu i biološku vrijednost, odobrenje za sječu ili potkresivanje donosi se po prethodno pribavljenom mišljenju Zavoda za zaštitu kulturno- historijskog i prirodnog naslijeđa Kantona Sarajevo.

Član 6.
(Obaveza održavanja)

(1) Održavanje stabala u obavezi je:

- a) vlasnika ili korisnika zemljišta na kojem se stablo nalazi,
- b) upravitelja zgrade ukoliko se radi o stablu koje se nalazi u okućnici objekta kolektivnog stanovanja,
- c) na javnim površinama nadležnog komunalnog preduzeća ili drugog preduzeća određenog posebnim propisom.

Član 7.

(Zahtjev za izdavanje odobrenja za sječu ili potkresivanje stabla)

(1) Zahtjev za sječu ili potkresivanje stabla može podnijeti vlasnik ili korisnik zemljišta na kojem se stablo nalazi, investitor novog objekta, upravitelj zgrade, komunalno preduzeće i zainteresovano lice.

(2) Postupak za sječu ili potkresivanje stabla može pokrenuti i općinski organ uprave nadležan za komunalne poslove po službenoj dužnosti.

Član 8.

(Potrebna dokumentacija uz zahtjev)

Uz zahtjev za izdavanje odobrenja za sječu ili potkresivanje stabla dostavlja se:

- a) kopija katastarskog plana sa označenim mjestom gdje se stablo nalazi,
- b) ukoliko se radi o sječi ili potkresivanju stabla radi izgradnje novog objekta, uz zahtjev je potrebno dostaviti i pravomoćno odobrenje za građenje.

Član 9.

(Troškovi sječe ili potkresivanja stabla)

Troškove sječe ili potkresivanja stabla snosi vlasnik ili korisnik zemljišta na kojem se stablo nalazi, investitor novog objekta, upravitelj zgrade, odnosno komunalno preduzeće u čijoj je nadležnosti održavanje stabala.

Član 10.

(Sječa ili potkresivanja stabala koja se ne nalaze na javnim zelenim površinama)

(1) Samo izuzetno, uz priloženi nalog nadležne inspekcije, te ukoliko se radi o stablu koje predstavlja neposrednu opasnost po mišljenju stručne komisije iz člana 4. ove Odluke, općinski organ uprave nadležan za komunalne poslove će rješenjem naložiti vlasniku, korisniku zemljišta ili investitoru novog objekta, da o vlastitom trošku izvrši sječu ili potkresivanje stabla.

(2) Ukoliko vlasnik, korisnik zemljišta ili investitor novog objekta ne postupi po rješenju iz prethodnog stava ovog člana, sječu ili potkresivanje stabla izvršit će o trošku vlasnika (korisnika) zemljišta općinski organ uprave nadležan za komunalne poslove, putem nadležnog komunalnog preduzeća za održavanje javnih zelenih površina.

Član 11.

(Izvođenje sječe ili potkresivanja stabala)

(1) Sječu i potkresivanje stabala iz člana 10. stav (1) vrše pravna ili fizička lica osposobljena/registrovana za ovu vrstu poslova.

(2) Prilikom izvođenja radova na sječi i potkresivanju stabala, izvođač je dužan pridržavati se svih bezbjedonosnih mjera.

(3) Sve štete koje nastanu pri sječi ili potkresivanju stabla usljed nepažnje ili nepoduzimanja neophodnih mjera sigurnosti snosi lice iz stava (1) ovog člana.

Član 12.

(Premještanje i zamjenska sadnja)

Ukoliko je zbog izgradnje novog objekta ili postavljanja instalacija neophodno uklanjanje stabla, investitor objekta odnosno instalacija je dužan da o svom trošku izvrši premještanje ili

sadnju novog stabla, uz saglasnost nadležne općinske službe za komunalne poslove, na mjestu koje odredi nadležno komunalno preduzeće.

Član 13.

(Nadzor)

Nadzor nad provođenjem odredaba ove odluke vrši nadležna komunalna inspekcija ako se radi o javnim zelenim površinama, odnosno saobraćajna inspekcija ako se radi o saobraćajnim površinama.

Član 14.

(Pravila postupka)

Odobrenje za sječu ili potkresivanje stabala, nadležna općinska služba za komunalne poslove donosi po pravilima Zakona o upravnom postupku Federacije Bosne i Hercegovine.

Član 15.

(Započeti postupci)

Ako je do stupanja na snagu ove odluke pokrenut upravni postupak kod nadležnog organa, a nije doneseno prvostepeno rješenje ili je rješenje poništeno i vraćeno prvostepenom organu na ponovni postupak, postupak će se nastaviti po odredbama ove odluke.

Član 16.

(Stupanje na snagu)

(1) Danom stupanja na snagu ove odluke, prestaje da važi Odluka o sječi i potkresivanju stabala Općine Novo Sarajevo („Službene novine Kantona Sarajevo“, broj: 12/09).

(2) Ova odluka stupa na snagu osmog dana od dana objavljivanja u „Službenim novinama Kantona Sarajevo“.

Broj: 01-23-736/17
Sarajevo, 30.03.2017. godine

PREDSJEDAVAJUĆA
Općinskog vijeća Novo Sarajevo

Baltić Ana

